

Konkurs za eTwinning ambasadore u Bosni i Hercegovini

Obavještavamo Vas da eTwinning Državna služba za podršku - Agencija za predškolsko, osnovno i srednje obrazovanje (DSP) raspisuje konkurs za dva eTwinning ambasadora koji rade sa djecom srednjoškolskog uzrasta u Bosni i Hercegovini i jednog eTwinning ambasadora koji je zaposlen u predškolskoj ustanovi na teritoriji Bosne i Hercegovine.

DSP bira ambasadore na period od jedne godine, 2023. godine. eTwinning ambasadori trebaju biti iskusni korisnici eTwinning portala, koji su zainteresirani da učestvuju u promociji eTwinning portala i eTwinning aktivnosti u području svoje škole/predškolske ustanove i šire.

Zadaci eTwinning ambasadora su:

- pružanje pomoći DSP-u prilikom organizovanja događaja unutar BiH u vezi s promocijom eTwinning portala i pojašnjavanjem osnova ili detalja za rad portala
- organizovanje i samostalno provođenje promotivnih i edukativnih događaja i obuka u školama i predškolskim ustanovama u BiH u koordinaciji s DSP-om s ciljem povećanja broja registrovanih eTwinning-a, povećanja broja eTwinning projekata i njihovog kvaliteta
- organizovanje onlajn obuka korištenjem IKT (informaciono-komunikacijskih tehnologija) alata; softver za onlajn obuke osigurava DSP
- doprinos u razmjeni primjera dobrih praksi s kolegama u BiH i u drugim zemljama
- učešće na sastancima, konferencijama i seminarima, samostalno ili sa ostalim eTwinning ambasadorima u zemlji ili inostranstvu na koje ih uputi DSP ili dobije poziv organizatora događaja, a uz saglasnost DSP-a
- pružanje drugih informacija u vezi sa provođenjem eTwinning-a u BiH i druga vrsta pomoći DSP-u.

Tokom planiranja i provođenja navedenih aktivnosti neophodno je da ambasadori kontinuirano saraduju s DSP i od nje dobiju saglasnost za svoje aktivnosti, posebno u slučajevima kada one podrazumijevaju i potrebu za finansijskom podrškom. DSP će snositi putne troškove za sve događaje za koje ambasadori budu angažovani.

Uslovi za prijavu

Zainteresovani kandidati trebaju ispunjavati sljedeće uslove:

- da su zaposleni u srednjoj školi u BiH/za prijavu za ambasadora iz područja srednjoškolskog obrazovanja
- da su zaposleni u ustanovi za predškolski odgoj i obrazovanje u BiH/za prijavu za ambasadora iz područja predškolskog odgoja i obrazovanja
- da su registrovani na eTwinning portalu <https://school-education.ec.europa.eu/en/etwinning>
- da dobro govore engleski jezik (međunarodni događaji namijenjeni eTwinning ambasadorima održavaju se najčešće na engleskom jeziku, razmjena primjera dobre prakse s drugim zemljama učesnicama eTwinning-a se, također, odvija na engleskom jeziku)

- da koriste IKT alate neophodne za rad na eTwinning portalu (alati za komunikaciju, pretraživanje, razmjenu materijala i oglašavanje)
- da imaju razvijene organizacijske, komunikacijske i prezentacijske vještine.

Odabir kandidata

Kandidati koji su ušli u uži izbor bit će obaviješteni putem imejla.

Konačna odluka o odabiru eTwinning ambasadora iz BiH bit će donesena sredinom januara 2023. godine. Sa izabranim kandidatima bit će zaključen poseban ugovor. Prilikom odabira eTwinning ambasadora vodit će se računa o geografskoj zastupljenosti predstavnika srednjih škola/predškolskih ustanova iz različitih dijelova BiH, o uzrastu djece s kojom rade i uspješnosti na eTwinning portalu. eTwinning ambasadori obavezni su da tokom obavljanja dužnosti ambasadora budu aktivni i da o svojim aktivnostima obavještavaju DSP. Ukoliko ambasador tokom jednogodišnjeg perioda djelovanja u toj ulozi nije aktivan, u periodu dužem od dva mjeseca, izuzev perioda juli-august i decembar-januar, DSP zadržava pravo da ambasadora razriješi dužnosti.

Napomena: Naglašavamo da se aktivnosti eTwinning ambasadora često preklapaju s radnim vremenom zaposlenih u srednjoj školi/predškolskoj ustanovi.

Kako se prijaviti?

Poziv za konkurs za eTwinning ambasadora bit će objavljen na www.aposo.gov.ba i na FB stranici eTwinning BiH.

Onlajn prijavni obrazac možete popuniti klikom na link: <https://forms.gle/daTAoKibr8SQXU9g7>

Uz obrazac je potrebno da na imejl adresu etwinningbih@aposo.gov.ba pošaljete:

- motivaciono pismo
- biografiju osobe u Europass formatu.

Konkurs ostaje otvoren do 31. 12. 2022. godine, a sve dodatne informacije možete dobiti na broj telefona 033/942-855/857 ili putem imejla etwinning@aposo.gov.ba